

希古堂集

希古堂文乙集卷第六

南海 譚宗浚 叔裕

重修悅城龍母廟碑

易曰立天之道曰陰與陽陽以亨毒而滋生陰以斂擊而成物是故地麗也毓富媪以蕃釐月闕也縟常娥而炳照星名寶婺光輝騰華渚之芒風號少姨噓噏動靈囊之氣亦有天孫織錦電母揚鞭瑤姬降而神雨來玉女披而香霧集斗何爲而稱靈姥虹何事而號美人碧漢候於黃姑元霜飛於青女自非神功不測馮翼無爲何以宏覆露於羣生贊陶甄於大造也乎謹案德慶州

悅城龍母廟者隋某年所立也歲紀屢更軒楹猶昔相  
傳神姓溫氏秦時康州人素以捕魚爲業留魴釣鯉放  
蠃拘蟣春汎桃溪秋潮荻港徘徊近浦殊漢女之弄珠  
容與中流類越人之擁楫嘗偶於水濱得一巨卵拾而  
藏之等娥臺吞鳳之徵譬河叟探驪之獲未幾果育一  
小龍出入相隨匪朝伊夕擾馴性適非同攫璧之蛟哺  
養恩隆或等銜環之雀岐岐脈脈宛宛延延浴修尾而  
黑蜃波翻涼飛鱗而金烏日麗故比操蛇之帝時豢育  
於青蛇何殊跨鯉之仙恆追隨乎赤鯉俄而陰雲四合  
雷雨晦冥岸圻林昏江翻石走迷濛黑霧疑變化於陶

梭呀呷紅波似飛騰於雷劍絕塵埃而遠逝非關貽孫  
思邈之方排闥闔而上征似欲送成安公之駕時咸觀  
一龍攫竿上空而去岷庶異焉厥後蕙質告殂芳魂已  
渺擬掩蛾眉之魄將營馬鬣之封俟焉列缺騰銳豐隆  
震杼石移武擔土運黎津巨柱飛於開陽蟠枝來於合  
浦飛沙浩浩則壅從襄國故城巨碣峩峩則徙自耆闍  
舊窟翌日來觀者咸見高冢屹然不勞版築護墳虎伏  
銜土烏傷薜蘿已銷誰知寡婦之穴松柏森拱云是淑  
人之邱雖誕比螺亭亦哀同燕冢昔有山名烏弔悲吹  
淒涼亭號鵠奔靈魂變幻怪偉之迹先後同符已由是

蠻蜚驚傳黎儀怵舞川原禁火宛爲介妹以興祠港渚  
迎潮共憫曹娥而建祀屬當旱魃爲虐甘霖未臻此邦  
之人是禱是迓神人四杵頓湧靈泉帝女三驍俄飛笑  
電散元駒於涇埵翔石燕於中林噓朽櫓以重生潤枯  
莖而更茂荆祠霖霖無所假於施鞭蜀市滂沱曾不因  
乎嘆酒茲非昊穹降祐靈貺靡涯者歟外若泮柯一水  
滙注南溟萬船雲趨千艘雨集管甯渡海有神光引導  
之奇顧愷浮江無破冢被驚之累斯神之利濟也西潦  
頻年懷襄告警波濤倏退井邑無虞鄉號更生里名長  
樂雖河傾酸棗偶勞拳峙於芻蕘而埭比甘棠終見豐

穰於黍稌斯神之捍災也沿江萬家閭閻櫛比禦饑悉  
應疵癘不生驗雞骨之卜以占祈鬪鷁頭之船而報賽  
妖邪悉避無邦亭驢鼠之災怪沴全消絕熒道蠶蛇之  
蠱斯神之佑民也昔歲潯梧萑苻肆擾神威默相次第  
就平甲仗疑趨弓刀自動控銀槍而拒敵羣欽虞塞靈  
神著金履以呼羣應少趙家老嫗斯神之盪寇也其稟  
靈也若此其昭應也如彼固宜神堂敬祀同波知國之  
三池仙洞長局比易州城之四穴沈豪牛之巨冊明禋  
恪奉於祠官駕飛虎之高航報祀長虔於海賈蕭脂靡  
輟俎豆維馨者已或疑神晦迹生前降靈身後迹鄰詭

誕事涉虛無殆莊叟之寓言等虞初之臆說殊不知空  
桑誕育毓神姿於緣鵠之臣苦李蟠根鍾異相於猶龍  
之彥彼聖賢之產降亦怪迹以恢奇又若化蟲飛而惑  
廩君乘鼈渡而呼河伯蠶叢之國迎五婦而峯摧豚水  
之旁應三郎而浪湧凡諸靈異多在遐陬以至博考元  
經旁稽逸竹媧何功而奠鼈北極嫫何巧而造繭西陵  
姑泉何應於絃歌女水何關於運會居湘靈於湘水何  
降渚而聞素瑟之彈宅巫女於巫山何導江而助黃麾  
之績何津名妬婦何溪號小姑何蠶孃微末而稱神何  
鹿女聰明而獲祐何瑯琊新婦留搗練之寒砧何蜀國

佳人聳開匱之石鏡何海填怨女何山負夸娥何祈禳  
而術紀紫姑何導引而靈通素媿何東吳少媛化形而  
昇茂苑之烟何東海婦人迂道而免灌壇之雨何鍼神  
擅巧敬邀乎蓬萊織女之車何瓦卜占豐爭拜乎禾穀  
夫人之祀斯皆屈平所問鄒衍能談匪盡屬乎譚言久  
已傳爲故事豈若楚南之俗誤祀杜姨搖峒之中謬祠  
轡女沿訛襲誤荒遠難稽者哉屬以星霜屢易棟桷全  
傾爰庀工徒更加畚揭其地也遙峰遠揖頗類盤蛇淺  
瀨平連偏宜拾翠泉鳴似玉何殊仙女潭邊石峭如帆  
卽是聖姑崖畔層樓矗矗絕迢迢香雲擁而似護祕



書明月臨而宛銜寒燭千櫺鶴跂輝水墨於泮妃萬拱  
虹連飾丹青於黻妹韓臺紫蜨更集珍林秦館丹鸞遙  
棲玉樹婉妘下視眺清臚於朱鳥之窗察洽旁趨奉神  
語於青牛之帳則有板搖木蜚魚婢蝦奴備致涓誠虔  
申芬靄隨獻環於猿女偕奉穀於鮫人繡銀旛而號祀  
姑扣銅鼓而歌憐妾妯簧奏響阿鸞嶰鳳之音嬋鼎升  
香澤雉江魚之味啟金屏於四葉繡羨眉孃奏琅曲於  
九成調傳毛女濯氛潔淨則華岳輸其玉盆飾像莊嚴  
則洛川貽其珠珮但見夫羣真綵繡眾嫵媵媚駕白虎  
兮驂翠螭曳荷衣兮披蕙帶水仙侍座金母張筵招媿

女於西河候神君於南岳玉蘭仙媛辭祕館以來儀某  
荊夫人降靈山而赴會授綠籍者九河之姥陪紫幢者  
八座之神語其仗衛也則郭密吹璈王登擊磬語其儀  
飾也則子占貢粉與贅調脂迎麻姑於賣酒田邊逐菊  
媼於披香殿裏結緒風迴白雪有劉三妹之清歌焉捐  
浮雲彗流星有董雙成之絳節焉洞洞乎屬屬乎信回  
皇而詭變吁可畏其駭人也下官言返故園式瞻崇構  
果李衛公之祠華岳自感泥塗同王子安之過馬當默  
祈靈祐肅伸誠悃敬薦馨香并勒元文鏤之貞碣將使  
碣苔斑駁永留保母之輒遙知山木蕭穆長護女郎之

廟銘曰

厥初生民悠悠上古地可撫輪天容倚杵履武徵嫫感

精誕禹異迹紛傳靈蹤就睹其惟神粹德毓美炎州姝

姿姒儷介節嬖儔薄言往鈞于彼中洲扣舷枉渚鼓棹

清流其異彼圓瑩遺於沙瀨煜若文玳粲如美貝于以

藏之維筐及筥精感蠶同氣成蜃類其方頤嶄角巨尾

長髻濯泉偶浴絃木恆垂如依夏御似起唐池風雲感

會霧雨奔隨其疇昔之年靈飛電掣鯨吸波翻蟒移樹

折玉鏡天昏銅磻地裂遽化葛陂言辭茅穴其劈山條

奮階木先升河東鯉化溟北鯤騰恍惚金闕迷離玉京

負圖安往躡屨誰乘

其六

隙駟俄催雲螭下召媼室沈輝

榛臺掩耀峽靜鷓啼山虛鶴弔蛤帳餘悽燕釵去杳

其七

如何感召歟忽通靈風號萬竅露捲四溟乍安女峽旋

建雌亭鳳牀永闕耐穴巖局

其八

伊此邦人競傳琦異薦

菊銘芬傳芭致祀悵望嫗山憑臨姜隧冀降神輶難留

仙袂

其九

瀕江郡邑比歲豐穰糧餘赤鷓穗降青羊白鵝

息崇烏鰓除殃惟神之庇降福不忘

其十

在昔交南素多

靈迹藍負青瓢鮑餐白石何井深沈劉巖男崩未若明

神鍾奇秉德

其十一

眷惟隋代肇建崇祠靈妃拊瑟聖女

張旗齊蟬苑噪樊鯉池嬉繒懸采女瑱飾嬰兒

其十二

歲

簷頻遷鳥穿蟲蝕梅換舊梁苔餘故塢虬駕不來魚軒

永寂攀絕軒湖盡迷禹壁

其十

爰加塗墍更備珊瑚雁

孃獻飾鵠女窺筵珠呈海客帙貢泉先香臺護蛻古鉢

噓涎

其十

四 隱隱兮奏簫樽樽兮擊鼓八變兮漢歌七盤

兮楚舞偕承橈兮帝妣邀辦脯兮王母願靈駕兮翩來

長連蜷兮故土

其十

五 繼自今兮以始永錫福兮九垓有

江斐兮效順靡颺母兮爲災母昆池兮涸水母薦福兮

轟雷于胥樂兮永無極長宴娛兮登春臺

其十

擬廣州城北新建昭忠祠碑記

洪維

聖清誕膺

寶命六服承辟八紘向風滲漉涵儒旣昌且熾爰有小  
醜槎蘖其間若菽粟之有莠稂跂喙之有螟特

聖天子奮軒戈而動眾握齊斧以伸威元愍旣平大功  
告敕而惟是擔簣析圭之士披堅執銳之倫命輕鴻毛  
義重熊掌或臨陣而致遭凶燄或守陴而力拒重圍河  
魁搖而大將摧易水寒而壯士死此則忠同鮑信宜加  
藻飾於丹青節比邵疇合設森嚴於廟宇肸鬻所繫斯  
爲重與廣州昭忠祠舊在西湖街嘉慶八年奉

旨所建祀前兩廣總督佟公養甲以下若干人蓋所以

妥忠魂崇令典也豆籩薦馨式比瀟山之廟陵谷屢變  
未迷長掖之基歲月遞遷蕭脂靡缺惟是堂皇湫隘棟  
宇欹傾下雨旁風蟲穿蝨朽每春秋二仲官吏致祭咸  
盡然傷之比年海水塵揚天街星鬪魚飛武庫棄甲先  
徵蛇出洞庭覆軍屢兆致命非無節士捐軀不乏良臣  
痛纏篋以空還問黃衫而早辦衝鋒被殞惜傅燮之無  
歸藁葬難尋悵謝摛之竟歿乃

曠典已邀乎

贈蔭而崇祠未奉其苾芬其何以茂矩貽今英風仰昔  
也乎今總督瑞公巡撫李公來泣是邦百廢具舉爰於

粵秀山之麓別營隙地創建新祠既麗既崇以妥以侑  
凡所補祀約有數端溯自己巳之役海氛煽擾艇賊憑  
陵或乘黃蓋小船或駕楊么飛船長繩密布竟鉤陶侃  
之舟竹箬先焚遂薄賀瓊之艦星日合鬪魚龍若飛惜  
橫海之無功痛沈淵而自殞此其宜祀者一也壬辰之  
役猺排拒險槃瓠成羣憑高則嶺聳天膺阻隘則峯垂  
地勝武漢度曲時見哀吟隴水磨刀先知傷手史萬歲  
懸軍深入韓千秋負勇直前業同牛口之窮遂犯龍頭  
之忌此其宜祀者又一也辛丑之役紅毛雜醜黑齒游  
魂大船高而如山飛鏃下而若雨調五陽之卒空費轉



翰置百保之軍莫周守禦遂乃茫茫川沸慘慘沙頽難  
支獸角之城疊警狼頭之燧波濤浩渺杜畿致溺於躍  
船烟燄紛迷鮑佐竟焚於烈炬此其宜祀者又一也辛  
亥之役地連滇瀨界限英韶皆竄倫存打稽競鬪始學  
灌夫之入壁繼同周訪之攀崖肉飛絕倫手搏相戰烏  
權窈窕行者過而心驚馬坂迢遙軍士臨而股慄妖鳥  
化而歸魂慟飛鳶啄而殘骸空此其宜祀者又一也甲  
寅之役鯨鯢偃蹇蛇虺縱橫塗炭極於累年攘擾徧乎  
數郡樊崇發掘冢墓皆夷朱粲劊屠村墟並盡或銜刀  
而赴難或蹈刃以求名曾無汗馬之勞卒兆沙蟲之化

姜維之膽死而尙懸來歙之胸生而已陷此其宜祀者  
又一也丁巳之役邊釁頻仍夷氛迭搆陶恭祖清談坐  
鎮未解麾兵王凝之鬼道荒唐無能制敵繩橋徑度關  
牡俄飛池魚遽至於遺殃社鼠竟令其竊據傳贊婆之  
契箭迭恣憑陵浮賢栗之箠船並遭蹂躪傷殘已極怨  
憤何多薤唱飄零蒿歌慘淡此其宜祀者又一也癸亥  
之役高涼巨寇潯桂遺凶漏網潛逃負嵎自固插雉之  
鐵警急時通化鯉之刀詭竒是託迫屢煩乎斧鉞猶未  
請乎灰釘郊原之爭戰頻聞亭壁之藩籬莫恃妖星乍  
落虛同祖逖以歸喪深谷仍追竟類陳安而殞命此其

宣祀者又一也乙丑之役逋逃小醜覆敗殘軍始侵掠於閩南繼繹騷乎嶺左幸草之遺根尙在微熒之餘炤仍存營三窟以潛蹤置四廂而設衛或陳端袁祕臨鋒而並已糜軀或衛福徐咸赴難而早先遇伏激昂士氣懷烈鬼雄鬚眉空切於怒張膚體殆同於鏤刻此其宜祀者又一也若夫苗逆之猖狂金陵之負固滇回之竊據豫捻之強梁亦有五管英豪三城俊碩倉皇捧檄屛屛從軍竟鑿凶門未與歸櫬殷孝祖羽儀自設終及死綏蔡道恭矢石俱窮猶勤守禦雖復地名全節依然臺企望鄉隔瘴海兮蕭條指修門兮彷彿銜鬚此度歸骨

何年幾同蛇穴之靈遺形莫化亦若鵲亭之鬼怨魄長  
埋尤宜慰彼孤忠虔其尸祝者矣嗟嗟大樹空零長淮  
絕澗旌旗縹緲秋風蔣帝之原板棧崎嶇暮雨彭侯之  
讖悲莫悲兮殘形之操痛復痛兮絕命之詞然設使其  
結纓不殞於沙場執戟但隨乎侍從帶裘鎮靜章烏從  
容則亦不過祭遵雅歌成瑨坐嘯葛融齋裏弓彈投壺  
曹璋軍中圖書櫛器剖鵠函而獲瑞置鴟尾以養威而  
已耳又安能蹈死舍生成仁取義繪趙營平之像疊荷  
褒嘉卹凌公理之孤兼邀

恩命撤祕器而祠杜預

命儒臣而誅黃瓊碧血一時丹心千古清霜紫電威望  
常存秋菊春蘭芬芳無絕也哉今者華構聿新明禋式  
奉千櫨鶴跂萬拱虹連凡此英魂茲焉歆饗生雖復搃  
芻斷脰難禦凶徒死猶當透爪握拳誓除醜類意必有  
精魂未沫靈爽常存如李藥師之徧插小旗如郭林宗  
之親提吉莫如霍山之示異間道容開如雷浦之助師  
陰兵忽見或弓刀而自動或甲仗以能趨此亦志士所  
以壯心宵徒因而褫魄者也走以不才獲瞻盛舉爰述  
緣起勒之貞珉將復管弦遠被卽爲都護之歌松柏森  
然猶是將軍之樹云爾

粵秀山重脩安期生祠碑記

若夫九宮洩祕丹房迴日月之精八史飛形素訣闡鴻  
濛之奧是以迦羅山下妙旨遠傳阮樂居中靈風並耀  
九天元父控鳳氣以翩翾四極真人授虎書而隱約雖  
復青童付錄黃累傳經難窮六紀之方未究三奔之道  
紫霞滅景空尋幃綠之宮青露飛文本出浮提之國荒  
矣邈矣無得而言若乃瑤室旋臺琳宮絳闕張叔隱煉  
昇之處別館猶存范邱林受訣之方靈壇且築鳳生府  
裏或有琅函馬積山中非無金竈訪仙翁於河上冀論  
淵源召處士於庭前爰留丹餌靈蹤未沫妙契斯傳謹

案安期先生者秦時人也內景夙探元文且授八皇證  
道啟紫笈以相貽五老流精策青筇而禮謁巖前偶駐  
惟給薤根洞口常餐時憑桂實猶龍妙術能甦徐甲之  
魂司馬祕方特授黃陽之要嘗賣藥於阜鄉亭上人不  
知也茯苓夜煮似向焦山竹杖朝攜時來洛市窮九垓  
而汗漫策十絕以翺翔馮延壽歌訣誰聞劉奉林仙方  
夙證上元使者舊傳綠景之經長里先生或饋青精之  
飢屬秦皇殷情訪道篤志求真旌璧紛投裏輪俟駕拜  
彭籛於上座擬論長生訪大隗於中途妙探至教先生  
悟真詮之莫授知晦迹之早期詭託留言遠辭塵壒白

龍化去空紀釣車赤鯁乘來莫尋法曲馭虎者九龍之  
綬飛鸞者八景之輿採積石而流英控蒙輪而跨御豈  
與夫鹿車偶下時涉漢庭鵲扇徐來先呈虞殿鍾山緘  
鑰密函帝嚳之書襄野迴鑾時駐軒皇之轡者乎乃有  
賁禹舊峙句曲潛通二禺遁迹之鄉重華經遊之地金  
塘隱現卽爲壘誓之都玉堞騫騰恰跨彫柔之海問丹  
砂於井裏採石髓於人間八瓊之室鏗鏘七寶之林照  
曜跨驪岸上羽客相逢剖鯉潭邊靈符乍見今朱明洞  
蒲洲寺等處卽先生隱迹處也於是合景丹成遠遊冠  
著十三祕館乘鹿躡以往來百八神君騁虬車而綽約



堂開羽景窗啟寒靈新傳餐玉之方仍講煉金之訣啟  
鬱林之笈則蕊字遙傳尋阿監之樓則銘音迭起行雲  
坐拊驚素女以揮弦奧穴潛探詔黃神而授印遂復冥  
資元感妙契無爲極始素以窮真辨太丹而證義龍文  
啟檢遙參八老之經鳳髓流英卽服四童之散扶桑大  
帝並授東華綠豆仙人不馳西極命陵陽而授笏叱夸  
父以扶輿比薊子訓之通靈受宋德元之飛甲靈芝熠  
煜疑爲伊尹之山古洞深岑恰類韓終之宅有元範焉  
靈軌焉旣乃上道斯成右英密告馬皇療病遂證仙根  
龜母呈圖特宣祕籍絳旄下拂先布誥於茅盈丹鼎還

開似脩眞於李脫保錄之圖萬字方神之印千端遺篇  
如接於曲陽舊迹莫尋於宛委甯封上化不俟飛魚周  
晉偶還仍騎白鶴遂使靈祇召感道俗景從同涓子以  
興祠爲羨門而立祀今粵秀山之祠蓋道光中所建亦  
奉靈像之所也京陵墓裏空劍猶飛苦縣祠前長波自  
湧迷茫玕殿似游光碧之堂鞏固璇題別啟中黃之館  
五精結烝人助垂芒偕眉竺以聯游並毛姜而謁見黃  
精萬秀匪云尹喜之餐丹桂凋英豈任吳剛之採星霜  
遞易劫火斯驚芝田委於荒蕪竹宮隨乎灰燼碑題半  
仆化鵠難稽鐘磬徒留鏗鯨莫振於是特仍舊址重拓

新規命般爾以成羣執斧斤而效役文鴛檻接下俯雷  
音陽馬簷高仰棲霞氣上清童子拜玉案而爭趨元羽  
仙郎捧珠繩而並錄琳琅法響雜沓香陰萬吹者拂澤  
之鐘千號者福連之簡神光恰照如游邠弗之臺高景  
遙分恍入楊寥之殿穆穆焉皇皇焉蓋可得而稱不可  
得而狎也嗟嗟人世千春風霜萬變王方平之興慨滄  
海都湮甯元甫之感懷劫塵幾換問鴻經而莫識嗟虎  
綬以徒飄誠心誰嗣於任敦絕學將同於薛旅元宮寂  
寞誰尋尹軌之居法樂銷沈莫辨王哀之曲獨此香林  
再啟祕籙仍宣垂虹繞而旛懸皓月窺而殿敞北河司

命詣玉座以晨參南極真君指銀函而夜授極輝煌於  
七照驚爰案於八停散紫桂以流華導元芝而漱潤洵  
編氓所競慕亦羽士所皈依者矣僕也學圃荒蕪閒居  
闕寂乞元膏於王烈莫究真宗裂黃絹於郗愔難搜逸  
簡嘉茲盛舉用綴蕪詞從此化闡三眞靈通九府五兵  
並辟奚煩承翼之符千禩常尊永化禪黎之劫颿馬雲  
車之去住銀泥繡羽之莊嚴歷龍漢以長新飄鳳簫而  
不落地疑西蜀建祠來三學之山城卽北鄴刻石想六  
宮之碣

擬虞仲翔祠碑

廣州光孝寺舊名虞苑爲三國時虞功曹仲翔注經之地

國朝嘉慶中布政使南城曾公就故址創建虞仲翔祠勒文兩壁年代悠遠漸就傾圮今歲春同人議釀金重修而屬爲之記曰緬惟尼山刪述昭若日星漢代大師寶承家法西京蒐逸則申伏泥蟠東觀隆儒則張曹通顯源流授受本末粲然若乃中原雲擾之秋四海龍爭之會獨能羽翼羣經纂述廢業者其惟虞仲翔乎仲翔幼抱高氣長稱家寶世習周易兼明尙書衍荀譚之支流作鄭鄉之誼友顧緣鷺直竄殛南荒禦蝮虺之藜藜

望鷺鳥之跼跼委骨瘴海羈魂蠻域譬之麟名遊聖乃  
跼伏於罽羈鳳號歸昌反栖遲於荆棘吁其痛已然設  
使繇繇果興學堂肇設粲粲門子侏侏學徒如張寬之  
七業俱興向栩之四科設教正未可云不幸也無何而  
賜葬北還下詔褒美堂宇久廢弦誦亦稀迨東晉初僧  
罽賓浮海至廣州改虞苑爲王園寺於是緇帷絳帳一  
變爲梵宇琳宮矣繼之者若智藥之壇慧能之塔房融  
之軒羅漢之井並復棟宇巍煥丹雘赫然道俗從萃而  
雲趨士女頌賦而頂禮獨此講堂鞠爲茂草叢灌駢雜  
猩鼯悲啼山鬼闕於前楹蛛網懸於外戶經汾曲者豈

識誦經之室過健爲者誰知注雅之臺嗟乎仲翔旣坎

壞於生前胡更聞寥於身後時序緜曖名字翳如臨風

欬歔獨有婁子景元千載知已僅存一人良由象教盛而

正學衰偁讚興而經籍廢芒芒赤土競溺於浮提總總

眾生將淪於葷衽夫豈獨仲翔之蹇阨乎嗚呼王學起

於北而元虛漸燭遂開裴樂之宗虞學起於南而絕緒

莫傳竟墜鳳歆之業論學術於吳魏間亦古今一大轉

機也

國朝樸學重興眞儒輩出近時元和惠氏武進張氏鑽  
聖虞義輯有成書而南城公倡建是祠適當其際並時

雖無楊意後世乃有桓譚靈兮有知庶幾欣忭然則登斯祠者當思所以挹遺風紹芳烈搜墜典續微言正非僅蒼松五蠶弔楊議郎卜居之址紅棉十丈訪陸大中行館之基云爾是役也經始於某年月日落成於某年月日董其役者某人若夫仲翔志行之嶽寄遭逢之困蹟南城公前碣備詳之此不贅也

重修朝雲墓碑

在昔蘇孃墓下大有留題蔣妹祠中非無流唱莫不被之翠管寫以紅箋聊因憑弔之辭用致纏綿之意況復靈根夙悟幾同解脫於青琴芳躅云遙半等沈埋於紫



玉亮瑤蹤之既往宜琬碣之重刊已謹案東坡妾朝雲者姓王氏字子霞錢塘人也前身寶月素具圓姿夙世鬢雲偶留豔質九張弄杼十索題詩姓名本類於吹箏才具原嫻於織錦生來慧性常居翡翠之巢結就芳鄰但住胭脂之匯方先生之倅杭州也簿領清閒湖山跌宕拄杖靈隱之寺置酒望湖之樓姬以錦瑟華年作紅簫入侍譜來折柳聽宛轉於新歌仿就簪花認玲瓏於密字掀聳婆而曲短贈跳脫以情深籠熏史鳳之香牋疊吳鸞之韻亦謂多情通德愛伴伶元解事清娛能隨司馬而已耳既乃蠻江遠去瘴嶺長征辭妝閣以偏來

跨香車而共往略同桃葉尙待迎不比楊枝還思別  
嫁乃鶴觀纔營於小築而鸞臺已見其長離苦吟陌上  
之花遽宿墓頭之草愴淒涼於漢曲淚盡哀蟬驚寂寞  
於秦樓聲沈彩鳳徒見夫荒亭蛤吠古樹鶻啼訪女峽  
以空存問姑泉而竟寂黃墟日淡寶瑟常僵碧榭塵凝  
玉魚竟殉不亦悲乎向使其鴛海無遷鴛閣但住聽來  
鳧漏第事早朝剔去雞缸常陪夜誦茶香細碾栗典旁  
搜數鶴珠而互讀心經然鮑燭而對修眉史額旁點黛  
時安子母之螺指裏搗絃卽辨君臣之曲固見房敖之  
韻事亦微烟楮之風流而乃殫碟長愁離襪善病身位

蔞蓉而易隕心如葶慙以先傷思鄉則蔡女難歸憶子  
則曹喈早天拍來絡鼓心掩抑以何堪寫遍琅玕恨連  
綿而莫已店裏之飛龍已出山頭之別鶴頻驚怨文杏  
以還殤悼香桃而竟悴聽鮑墳之唱尙有零篇歌楚挽  
之章仍多滯魄嗜何酷也嗚呼蘇卿北去少婦辭堂枚  
乘東歸小妻戀室大抵化離之感半從徙謫之餘獨茲  
之節勵貞松心同苦蘖恥作辭巢之燕仍爲逐隊之魚  
隨轉徙於畚鄉共飄零於颶海曲房簾卷寒聽絡緯之  
聲孤館燈明愁觸枕櫛之瘡亦可謂柔情獨抱勁操常  
標者矣若乃耽味道因託心禪悟冀同法喜還證眞修

願比曼殊仍超淨果銀旛繡字白笈細經參妙諦於空  
空唱慈緣於得得此則情根未了當重生優鉢之蓮慧  
解誰超待更證菩提之樹又可藉微雅契聊息塵心者  
也今者舊阼幸存荒阡如故繞牆薜荔似黯淒魂傍砌  
櫻桃疑含怨淚感芳姿於冷落驚殘蹟於榛蕪爰合同  
人更加庀築石麇尙峙墳雉猶高僕也衛虎愁多崔駟  
恨結聊裁陋製爲勒貞珉悵瑤草以徒芳惜曇花而竟  
墜庶使紅芍唱出咸知蛺蝶之臺匪徒翠碣鑄成永樹  
鴛鴦之塚

重修梁藥亭先生墓碑

太上以至德不德無名爲名其次則勒鼎刊鐘耀洪伐  
於狼胥之石又其次則飛文轡藻垂芳稱於蠹簡之篇  
是以孟亭敬禮於孟公杜濱特祠於杜子鄭鄉絕學生  
徒隆釋菜之儀宋宅遺芬巫覲激傳芭之唱嘉聲所被  
肝鬢斯虔雖珪律遞更而蕭脂靡輟若吾鄉梁藥亭先  
生者有足稱焉先生姓梁氏諱佩蘭字芝五晚號鬱洲  
廣東南海人也稟粹鴻鶩挺姿鶴潔以闕駟宿讀兼袁  
虎工文辨顯節陵之遺篇識崇禮闕之舊鼓魯桓鄭穆  
故典能該堯韭舜冠博聞善對尤工聲律獨出冠時或  
孤秀神厓或負思絕嶠或掣鯨碧海或振鳳丹山蕭瑟

泓淸汪洋演迤李十郎之好句允宜圖扇爭書孟六丈  
之佳章合受畫圖徧寫由由然恢恢然信乃藻拔不羣  
文外獨絕者也屬明季玉弩驚飛金椎失御吳衰庚子  
虢滅丙辰白雁集而國墟蒼鵝飛而寇起毒氛噴薄山  
藏林屋之蛇驟雨掀騰野走昆陽之象先生移家卜築  
避地徧徠鑿黃獨以爲餐采紫芝而發詠馬瑤置兔自  
樂巖間夏統拘蟣還棲海曲蔡徵以瓠齠作饌扈累以  
甄甌營居旣而河岳夷謚風雲復旦

皇圖丕拓儒術再振李業仕而漢道昌常景徵而魏德  
盛以順治十四年舉鄉試第一人屢試公車未第迨康

熙二十七年成進士選翰林庶吉士去鄉舉時已三十餘年矣時座主爲崑山健菴徐公故先生昆弟交也與先生爲四拜禮凡同人館者皆敬先生事之如前輩其爲名流引重如此時也耆年知遇特重盧鈞宿學淹通不名劉兆躡衣者踵至納屨者麇承珍饈貽婁護之鯖厚幣贄陳謚之雁郭翻小舫屈禮貌於通侯趙壹柴車抗班行於上客或有勸遂官京師者先生天爵自高宦情早淡著懷田之賦成誓墓之文但憶當歸頓忘遠志明山賓讀書不輟豈合爲官阮孝緒筮卦已成早思遯世於是辭赤紱整歸艤殺馬毀車焚魚謝組讀臺佟之

傳風羨壯遊圖宗測之形每相對坐願同翡翠恆回煖  
以翔飛思作蜘蛛或吐文而隱逸偶逢漁父鱸具相邀  
時值鄰翁鹿牀共倚蓋志量自此遠矣其居鄉也屢空  
晏如十旬九食范丹困甕釜欲生魚虞玩清貧履皆斷  
革而先生處窮以儉在約彌貞封題如故時辭陳敬武  
之綾干謁必嚴高揖宗道暉之屐以故鉅公大吏咸致  
敬焉若乃緇帷肇設皋比坐擁誘掖後進宣揚景業注  
經之地或號小巖卜宅之居迴成讓木鬻茅作室遙疏  
韋孟之基種柿成林共識劉歆之宅泰山應劭甘北面  
以修儀母斂尹珍或南來而受業于以翫油素於以息



邱樊偕論易於醬翁約談詩於木客白麕馴擾來貽辛  
繕之祥黃鳥翩翩時伴陳翁之讀又嘗偕陳獨漉恭尹  
何不偕絳陳喬生子升王蒲衣隼陶器圃窳等同結蘭  
湖吟社車斜鬪捷競病爭長題江總之華牋押王筠之  
強韻設清齋而作供端同蓮社高賢坐釣石以相娛宜  
比竹溪逸士晚登大耋尤享盛名藁夫亦識乎韋負漁  
侶樂親乎陶岷折松代塵羣聽樹講於張譏糴米貨羊  
未易求書於高爽留題甫就織成蠻峒之衣噓拂所加  
價重葢山之扇既乃石雞坵兆巢鵬占凶愴陸續之題  
辭悲趙嘉之刻石梁鴻葬地翻近要離王肅營墳還依

杜預以康熙某年某月日卒有子若干人孫若干人今  
廣州北門外訶子嶺卽先生葬處也法華共殯堯與同  
棺荒藪則尙臥麒麟列樹則徧棲鸛鶴植花何點能知  
志士之墳學算許商猶憶先師之塚歲時奠醑幽魂安  
焉然而青草一坏墨塵萬劫楹書罕繼麥飯誰澆柳下  
之壟徒傳縣上之田久缺遺孤莫問誰懷馬侍御以興  
哀荒冢空留遂致熊將軍之構訟樵僮躑躅牧豎往來  
幾磨蕭秀之碑擬伐王哀之柏曩者道光中邑人大中  
丞吳公榮光曾加脩葺勒石鐫碑甫及卅年荒涼逾甚  
嗚呼洛中敗虺猶邀殞殮於曹褒江畔殘骸尙荷掩霾

於王果矧先生風流未沫體魄斯存生既曾躋九陞之  
鸞歿竟莫保一邱之貉郭林宗之故墓吉莫無聲史豫  
章之遺塋絃歌忽闕寃魂夜唱時出鮑墳壞土將積竟  
迷滕室不其悲乎今郡中搢紳眷念遺徽特捐贏羨役  
班倕之羣蒐瓴甌之具移蟠枝於華嶽運息土於黎陽  
九歌者楚巫之章四版者射稽之曲柱來白鶴恍歸丁  
令之靈隴接青龍疑下嵩真之椀爪犀蔗節更從東府  
以招魂弱席蘭膏爰效南荆而設祀刻元文於高闕咸  
知祭仲遺蹤燒潔醑於重泉足慰摯虞餒魄圈公胙机  
虔奉芬肴徐則香鑪更昇苾霽又設粟主於城西文瀾

書院并置產爲營祀典春秋致祭禮也嗟嗟靈爽于春  
榮華一夢鄭文淵之達性空葬陶家羊叔子之好名何  
如歌伎南山石櫛詎足久存東海揚塵曾非故迹悟化  
者以浮生爲大夢達觀者以反土爲歸真獨此佳城未  
迷陵谷抗懷懿範應多下馬之人憑眺芳蹤或有弔蠅  
之客抑未可云非厚幸已宗浚住王戎之墓側解唱黃  
塵過武氏之闕前曾瞻畫像嘉茲盛舉用綴小文庶松  
楸不至於毀傷蘋藻益虔其報祀白太傅魂歸兜率宜  
十洲三島以徧遊徐有功葬近石倉喜八牖四門而再

合銘曰

傳國肇周封侯興漢美矣崢門膏梁之冠英英先生含  
靈孕誕爛若錦披瓊兮玉璫鱣兆集堂螢窺伏案龔馥  
芸香拮殘竹汗書別九共易明五讚峻義標峰英詞決  
瀚早值陽九國隗家難惜誦屈平傷時王粲託興篇章  
抽身烽燿極目四愁有懷九歎

皇路載清卿雲赫煥乃應嘉招大猷是贊螭坳獻文雞  
樹擣翰騁譽雲廳馳稱蓬觀六莖奏曲五花騰判世仰  
曼容人欽元晏英彥盈門貴游式閉谷有鳴騶庭多贊  
雁或謂奇才宜登楨幹先生喟然名縉利糾郎署顏潛  
吏曹蕭憚曼倩小官安仁拙宦孰若返真優游伴麋鹿

柴營居牛溪對岸拏艇葦間彈琴松畔待月開移看雲  
築館石任陶眠竈宜嵇鍛黃犢抱殘白鷗狎慣澀勒新  
村菜莢小泝友是羊求奴呼稽段翦韭邀朋移橙結伴  
餘事歌吟沈雄精悍風發濤轟霞蒸虹貫東岳氣凌西  
江腸盥素紙爭鈔紅簫細按金像賈仙旗亭王渙撰杖  
交迎折巾共看嵩嶽摧峯泰山促算歸骨芒羊棲神汗  
漫志士歎傷行人驚惋鶴弔賓歸驢鳴客散何意百年  
星移物換嶼半邱摧藏一旦蟲語蟹嘯磨遊麋窟鹿  
觸枝乾螢飛燐亂挂劍叢荒生金石漉但泣棠梨誰攄  
竹彈嗟矣大鈞陰陽鑪炭曷仁而戕曷暴而追曾是善

人不恆貞幹頴灌宗摧楚敖祀斷香絕焚椒何人饋饌  
夕樹猿號晨曦鷓喚爰命家人庀材築榦草長新塋松  
環舊丁白石翔標青泥飾墁黛點崇阡紅流絕澗慰此  
幽魂懽忻悅衍奠有鳧觴送疑蜂飯蟻結長留鵠亭勿  
怨永謝殤魂同超佛願北辰星移東海石爛此碣長懸  
鐫銘翠巘

楊貞女傳

貞女姓楊氏浙江慈谿縣人邑貢生慶恒之季女也祥  
門誕慧瓊範秉德宋家競秀尤數若華郁氏稱名特傳  
叔異及笄許字同里葉氏子金齡故績學士也方冀其

鸞鏡交棲蛩氎並坐委蛇之服雜珮相磨宛轉之絲同  
功並就而委聘甫竟沈疴已嬰遲寶扇以未歌指玉棺  
而遽下顏淵厄亥早徵妖讖之遺墨翟逢壬大有憂生  
之嘆訃至家人以女性烈祕不使知旣而惡耗漸傳驚  
魂莫定聽來別鵠徒事張絃慘甚枯魚將同銜索露鬚  
竟弔瑣尾難安身同葶藶以空留心似芭蕉而易碎比  
衛敬瑜之婦令改適以肯從類曹文叔之妻原捨生而  
欲決綯繆慰喻終不自釋父母知其意決俾遂所懷蓋  
其歸於葉也去生之死已六年矣於是再拜姑嫜重奉  
匱主折奠之教有待於後年顧杼之職必勤於夙夜抑



抑著其善下嗷嗷極其精思盥乍興而雞鳴織未就而  
烏起泉中鯉躍卽驗孝思樓上燕棲常偕子影綜陵雜  
而必理屏鉛華而勿矜惋順足徵勃谿無邊有閨望焉  
壺則焉庚申歲賊陷杭州女謂人曰寇深矣避地無益  
祇取辱焉舍後智井是吾死所也事雖未成而貞毅之  
氣具見於此誓比呂榮而殺賊擬同饒女以投江故知  
青松振颿落落結其芳吹白石出水粼粼喻其明心然  
而竹本孤生藥名獨活七陶八冶憤惋何多六意五心  
鬱伊彌感蓮子之根實苦卷施之草已傷口銜闕以無  
言尾畢逋而易瘁機中絡緯催成寡婦之絲山上蘼蕪

空等望夫之石加以飛龍骨出獨爾愁長沈沈誰望於  
越臺慘慘偏同於魯市采來芣苢自切憂思邁去萋蒲  
彌增善病遂以某年月日卒春秋僅二十有五嗚呼守  
貞有志夙同東海之稱賢善養能名轉似北宮之未嫁  
山號女郎而安問城名寡婦以空存轆轤之恨難勝箜  
篋之歌竟悼見靡笄於嶺上倍憶代都認題字於扉前  
願還陰氏噫嘻烈矣夫情不越禮昔人所稱未嘗合卷  
於同牢何事酬恩於許劍然而有生有死求仁得仁霜  
雪隕而陵茗自耀其華烈火焚而硯石愈堅其操典崇  
配祀奚慚沛郡之賢禮式旌閭足媿上虞之里假令其

樹萱可慰集蓼無嗟歌黻佩以賡詩奉弦韋而飾禮班  
來興慶特見隨行畫入甘泉每聞寵遇亦不過六珈耀  
飾萬石稱名而已耳又何以追奇迹於曩蹤激清風於  
來禩也哉先是女舍旁有金橘樹一株實纍纍熟及女  
死而樹忽萎留題偶在卽爲謝氏之樗灑淚所餘仍是  
王裒之柏雖復庭徵馴鹿縣署義烏昔人所推何以尙  
此生平無他嗜好不尙華飾不聽音樂惟日誦貝多楞  
嚴二經或奉佛香燈達旦琅函細綴密書毗奈之經香  
饌莊嚴獨比瞿夷之供此則三空已悟七會咸歸了漚  
電於一生歷飄塵於萬劫月中騫樹未必長明天上曇

花豈能久駐又可藉徵懿範彌表靜修者也余與貞女之兄泰亨交辱訂於忘年誼夙聯於同甲屢平送遠曾憶誓盟鮑照寄書空餘簡札示其始末俾述生平嗟嗟曹娥碑在足增烈士之心武氏闕存倘繪古賢之像青鸞去渺黃鳥歌哀招魂或化於韓憑寄望猶同於來歎想精靈於胎蠻請興梅冶之祠辨樂府於新題宜譜華山之曲是用述其梗概綴厥蕪詞後有續劉子政之遺編傳魯女生之軼事者或有取於是文云爾

鄧嘯篋茂才誄

維同治十一年九月晦日吾友鄧君嘯篋以疾終於里

第春秋僅三十有二嗚呼痛哉麟亡月死鯨殞星沈嗟  
彼哲人遽埋夜壑若其風神散朗意度冲夷聽裴綽之  
談如聆古瑟見謝莊之到不著寒衣望望振於清標恹  
恹著其雅量譬之長河萬頃爰木千尋浩浩然落落然  
不足以方其涯涘也少失乾蔭奉母獨居澣石慶之中  
翫潔穆員之滫膳下帷受業則擘精韋逞之經解帶求  
榮則希志周磐之舉內行篤備僚友稱焉性本恬雅尤  
好聚書目飮萬籤手披千部疎星入戶執卷猶勤旭日  
映檐擁篇早起十行並下七事能知無朱穆之專愚有  
李康之篤志九萬餘帙條鈔極其精勤八十一家闡誦

悉其原委早工詞賦近稍治經摺摭異同搜求得失或  
疑字未識則檢書互商或奇聞忽逢則箋紙分錄信所  
謂隳枯其德斧藻其文者矣既雋膠序聲稱益高老宿  
傾衿鉅公擊節蘭筋始奮蹴冀野而先鳴鼃采流輝炫  
荆山而自貴何圖疾遽天天年業徵巢鷲之凶遂應  
嗟蛇之讖王延壽見傷妖夢祈禱無靈柳世隆自署題  
名歛歔欲絕嘆藜蘭之已殞嗟拱木之將積是果兜率  
宮中尙需才子陳芳園裏必主詩人也耶宗淩曩者與  
君流連魚鳥狎玩烟霞水埭尋花山堂釋菜看棉北郭  
折芰南園聯輿穿蒲澗之雲並舫聽荔灣之雨丙茵醉

吐則濡首狂歌李笛橫吹則吟唇發奏况里閨其相望  
復褻展以頻過借書而瓶酒交承屬句而郵筒互寄趙  
岐藁在許巖象以同觀沈約賦成俾王筠而共誦今乃  
夜川屢逝朝露俄晞殉棺徒記於法華志墓空存於圓  
石柩中之塵但記乎遺言床上之琴已虛乎良晤閉佳  
城而鬱鬱聽挽曲以蕭蕭嗚呼易理云亡天折幾同於  
王弼詩名空在贈官難慰乎方干以是思哀哀可知已  
昔人云誄以觀德又云誄者累也累其德行使之不朽  
敢援斯義用抑悲忱詞曰

圓穹上昇厥象昭麗至化中含真精內秘或乃騁能鉤

探見忌蘭馨斯挾玉纈而碎猗歟鄧子寶誕清門銀艾  
相襲耀乎里闈鸞龍煥采虺豹韜文吐氣彌耀馳芬遠  
聞既選膠庠聲譽斯赫翰無停披篇若宿構鸚鵡賦成  
枏榴製就允矣珪璋蔚然領袖斐才既雋懿行尤虔虛  
懷若谷上善如川行靡谿益志無滑圓韋弦著誠巾机  
銘篇何謂中年遽傷遼薄李廣精亡柳調體弱消渴難  
醫病疴復作駐景無方返魂乏藥藏舟永悼輟瑟俄驚  
噉然喪魄嗒爾遺形青蠅寂弔白驥長鳴親朋屑涕族  
鄙吞聲嗚呼痛哉惟余與子情親迹密好結盍哉分敦  
投漆紅螺泛杯青蠹排帙屢踵嵇鄰頻來崔室余昔鍛



翮子來慰存余昔邁閃子來唁言深情海溢雅笑春溫  
名言未沫古誼攸敦嗚呼痛哉子病經年履綦罕至慮  
子清羸起居匪易後會方期遺徽倏逝千丈松崩九英  
芝悴下有弱小上有高堂子雖瞑目願領何長差池燕  
去憔悴烏傷白日慘愴黃泉渺茫嗚呼痛哉人亦有言  
彭聃匪壽子之遺文傳誦萬口濤掀雷轟夔振雕吼紀  
算匪窮聲名當久又聞才士上感英靈返位瑤闕歸魂  
紫清遊戲閭闔乘輜駕軒茫昧誰覺窈冥孰徵嗚呼痛  
哉繫我中年友儕見棄獨子神交始終靡二誼切范張  
感均莊惠牙軫輟調德斤罷試素疇慘慘青精悠悠柳

翼移遠松阡闕幽削牘愁慟隙詞涕流敢傳令德報子  
千秋嗚呼痛哉

翰林院編修繆君妻莊宜人誄

維年月日江陰繆君筱珊淑配莊宜人卒於京師春秋  
三十有七越數日筱珊以所撰事略見示且言曰願有  
紀也宗浚驥仰芳徽備聆懿行表德之製所不敢辭謹  
案宜人姓莊氏諱思琇江蘇元和人故甘肅鹽茶廳同  
知署平涼府知府城陷殉難

贈太僕寺卿銜莊公裕崧之次女也誕祥崢門鍾慧綺  
歲誦南國之什夙守令儀擬北山之文羣推麗藻時以

餘技兼精寫生曹婦草蟲管姬花鳥吮毫棲翰咸得父  
風屬遘家隄流離蜀有遇險彌夷之操有善心爲窈  
之姿其歸我筱珊編修也春應相荅嬰煉共諧敘歡則  
育育歌魚儷影則同同比鳥蛩氈曉對鳳杼宵懸九華  
然菡萏之鐙十樣寫菖蒲之紙荅顧彥先之贈句合署  
瑤函佐車武子之讀書曾拋金翦代供子舍之職尤得  
高堂之歡操井臼以忘勞佩韋弦而式禮時嫺黨族姓  
同居成都者凡數十人宜人姪畫旣周豔然有序三隅  
補竈七緜裁衣米蕘細腰薪然長腳刈葵汲水免役稚  
孩縛箒鉏園屢催臧獲陵襍穢細咸綜理焉旣而盧肇

登科秦嘉上計遠迎眷口言赴都門鮑姑以徙宅之官  
梁婦以挈家就道宜人睠懷西笑言賦東征孟筍姜魚  
肅陳潔膳張梨朱李先奉安輿提攜乎凡婢倂奴料理  
乎脂田粉確時也一宿再宿山行澤行過蜀郡而吟么  
鳳之詞渡涪陵而寄紫鱗之札拜叢祠於巫女古峽猿  
嘯訪砧石於楚夔荒臺鳩叫以至小姑廟古慈姥磯高  
造峰窺石鏡之光曉日渡錦帆之浦晴江漲滿儼泛醪  
醪溟海潮高聽歌囉噴蓋由蜀入燕凡八千餘里行人  
安穩徒御不驚皆宜人力也既抵京都言笑晏晏閉關  
頌酒讀書評詩筱珊以宋敏求之善儲藏兼劉貢父之

精鑒別典釵購帖傾笥易書每有所需輒謀中饋嗟乎  
南國佳人圖成鞏鑑西京才媛記弄研神以今方古豈  
其遠哉所居在宣武門南爲朱椒堂先生涵秋閣故址  
軒房邃閣欄檻纏迴遠山疊而映螺淨水涵而立鷺芳  
草積徑雜花滿庭相與踞石品棋支窗讀史帖臨新婦  
對吮麟毫香燕女兒勻添麝炷四葉展眉孃之繡七弦  
彈毛女之琴牽蕉葉以緘愁韻桃花而得句研朱互斟  
獲吾妻鏡之奇書剔翠分摹辨季姬匣之款識更或香  
囊競賭貝葉同繙刻印章而輒仿驚鴻按箏譜而便工  
打馬葳蕤別院間憶藏鉤栲栳回波屢偕舉令斯晨斯

夕其樂陶陶固將遠企劉樊近逾趙陸者矣自云佳耦  
可冀百年豈意薜花奄然徂謝兆噩徵於吹臼罷遺響  
於捶琴骨瘦香桃心酸苦苜忽乘吳市之鶴儼化齊臺  
之蟬嗚呼哀哉先是宜人與適某氏姊最相友愛病時  
展其遺畫歛歔竟日意者結璘振轡約伴偕行姪女昇  
眞騰雲繼躅吁可異已筱珊高柔愛篤荀粲神傷拾遺  
芳於蕩草希返馭於稠桑痛聚魂兮東岱愁埋玉兮北  
邙僕乃抗言彭殤一致弱水塵棲驚波湍逝烏鳶匪酷  
莊生所以達觀芻狗不仁老氏爲之累歛芝以秀而先  
挾桂以馨而易悴總大化之推遷獨榮名而足貴睠懷

懿德無媿女師郝鍾雅範宋鮑芳儀宜綴芬於煒管先  
彰美於旒旗敢作誄曰

貞幹不恆搏沙易脆嗟哉淑人駸駸先逝芳容掩媿靈  
駕迎魏翠隕湘篁紅凋楚蕙淑人伊何其德孔明昔在  
髫鬢如瓊如英刻茗著慧賦茗傳名既擅六法能通四  
聲作配蘭陵閨房德侶華飾屏今樸修媿古小篆摹蟬  
高詞賦武唐韻待鈔漢書擬補結襦在昔錦江之濱識  
邁辛憲才逾左芬執筐春曉獻襪冬晨姆儀共仰祥女  
咸欣累載京華承歡旦夕婉婉媿媿柔嘉維則五醢工  
調八梭善織手賦酒漿躬親履屐爰從暇日勝賞相尋

頻伽並命梔子同心投壺博笑刻燭催吟芍藥詞寫菜  
萸酒斟曉曉之輝忽昇而墜亭亭之柯忽榮而悴何意  
華年竟先邁厲弦斷鸞膠帳殘蛤淚嗚呼哀哉奔月忽  
去乘虹不歸霜零漢珮霧卷秦衣語燕窺幙流螢入幃  
但覩塵硯惟餘故機嗚呼哀哉西指茂岷南瞻吳會渺  
渺孤魂馭風安在百蜨飄翬十螺掩黛空薦黃蕉悲簪  
白柰嗚呼哀哉聽晨雞之咿喔兮傷路驥之悲鳴辭蘭  
閨之密幌兮就松隧之幽局良人佇望以靄歎兮宗戚  
屑涕而屏營敲玉釵而兆讖兮悵羅袂以無聲嗚呼哀  
哉銀燭然兮芳榭晚屑淒風兮若將返靈輶舉兮丹旄



垂翮瑤蹤兮杳莫追繫媧土之搏人兮究苑枯其曷故  
何秉質之塞淵兮竟溘先乎朝露盍召靈妃使隸詞兮  
詣婉妤而上訴恐閨風闐闐之未易登兮終茫昧而難  
寤惟芳型兮婉順足貽範兮千秋蔚高標兮霞映穆惠  
問兮川流落花冒兮芳域宿草生兮媿邱縱飄輪兮遞  
換終靈鑠兮長留嗚呼哀哉

擲硯亭弔李子長先生文

先生諱孔修字子長南海人明白沙陳文恭公高弟子  
嘗應試至貢院苦搜檢苛碎因擲硯而去遁隱西樵山  
中以畫自給方文襄霍文敏皆重其爲人今山中有高

士祠卽先生讀書處也余辛未歲被擯春官返里後踞  
踏北城有亭歸然云先生擲硯遺迹意有所感遂發憤  
而獻弔云爾詞曰

余秉修以潔簪兮奉仁義以爲正守過庭之誥訓兮思  
振采以揚名痛獻藝而屢擯兮心猶豫以屏營登城隅  
而騁望兮蹇驥躑躅而不行雲黯黯而愁色兮樹騷騷  
而慘聲過茲亭而騁望兮仰清標之峻厲嘉夫子之絕  
塵兮果蟬蛻乎濁穢奉江門以爲師兮結弼唐而密契  
被銀佩之襍褻兮又覽荃而帶蕙杳榮膺之若雲兮亦  
何求於斯世惟有明之中葉兮士風蹕厲以激昂彼公

卿知重乎節義兮卽黜僧亦愛乎文章雖敝冠壞絮而  
曷恥兮足等貴於侯王誦書篇而矻矻兮歌商頌而洋  
洋曠超舉以遐隱兮用白日於羲皇何今俗之翕訛兮  
視菀枯爲好惡苟騏驎之服箱兮杳掉臂而不顧倘羸  
牂跛鼈而昇於天衢兮世羣羨其得路楸充幃而以爲  
美珍兮蘭在棘而任其銷蠹畏眾口之謦謦兮疇所容  
其託步昔齒髮之未燥兮竊獨好此雕蟲旣繡之以盤  
悅兮願黼黻之待充何采章之不耀兮鬱秉心以忡忡  
余豈敢謂司命之失衡兮果曠曠以夢夢譬衛賜之求  
逸馬兮恐立說之未工余豈不知躁進之宜懲兮胡壯

趾而貽悔也日冉冉其迫崦嵫兮恐親年之不少待也  
吾欲求韓終之藥以奉高堂兮冀臻年於耄艾望華山  
而霧晦冥兮杳不知其所在之升斗以承歡兮泣漣洳  
而自慨吾既不能如先生之高舉兮獨蹶躒於風塵卻  
梁肉而弗御兮甘蓼蟲而嚙辛邑余情而不樂兮將馳  
軼乎九州振余珮兮飛雲岌余冠兮遠遊攀太行而過  
嶓冢兮梁西海而臨不周驚波濤其洶洶兮曠野廓其  
悠悠將駐轡以何所兮心飭結以增憂吾無煉金點汞  
之真術兮豈白石而可餽恐道渴而遭斃兮隨夸父於  
鄧邱吾又思休家術以怡情兮託波濤於鴻筆慕先聖

之微言兮極覃思於著述媿末學之膚淺兮意拘愁而  
自失婦號寒而投杼兮兒啼饑而索粟謂貧賤之不可  
長兮嗟交謫於爾室心煩冤以怵憚兮終夜鬱以悒悒  
覩熠燿之羣飛兮聞蜻蛉之淒鳴彼微物之翾動兮猶  
託天地而遂生何吾人之於邑兮挈孤影以負負忽慶  
忌之來召兮翼浮雲而上征揮青鳥以來導兮曰將詣  
平紫庭顛莫兮太清映麗兮曾城白虎兮敦圉飛鸞兮  
送迎連蜷兮孔蓋琴麗兮翠旌塊圮兮霧涌砰礚兮雷  
驚緊張仲之孝友兮宜主象乎文明胡游夏之淹貫兮  
曾不參掌其權衡彼淮南之雞犬兮亦白日以飛昇胡

垢濁之冒進兮曾弗加乎天刑企聞風之層巔兮揖盧  
敖而共語謂進退其孰宜兮曾莫知吾所自處將攘詬  
而忍尤兮抑離羣而絕侶曰汝稟精以淑懿兮發蘭石  
之自然何千里之偶蹶兮遽懟恨以惛惛盍放心舒志  
以自慰兮毋紆鬱以捐年昔漢武之好士兮金馬開而  
麇集彼馬董之賦不遇兮人猶議其褊急馮顯志而自  
哀兮梁發歎於五噫趙骭髀而窮老兮虞貶謫於南陲  
嵇養生而遘釁兮謝羅罽而懼危孟迍旨而被放兮盧  
釋愁而痛悲李嘔心而徒苦兮劉直諫而忤時韓獻書  
於光範兮哂賢者之自卑羅終身於韋布兮名乃震於

華夷彼昔賢之貞志兮蔚文采以陸離苟時命之方蹇  
兮雖備豎得而笑之果隨和之在抱兮終振采而有期  
伊太鈞之幹運兮理奧祕而莫知雖報應之遲速兮曾  
不爽乎著龜使徒孔墨貴而稟蹠賤兮又何足示乎神  
奇繫勝國之逸民兮甘委心而枯槁與鹿豕而爲羣兮  
任韜明而掩藻方今

皇途之穆清兮汝何事乎高蹈悟齊庭之伏鳥兮何致  
身之必早果騰驤而沛艾兮終奮驅於皇道忽魂悸而  
魄動兮淚淫淫而不自持撫身世而忖度兮懼明神之  
我欺吾亦欲服膺於明訓兮心忼倪而轉疑也恐偏激

以戾俗兮夫何能混蘅芷於葦施也倘介山之可隱兮  
吾又安羨乎太廟之犧也朝濟乎珠湄之澗兮夕覽夫  
樵湖之麓尋先生之舊隱兮撫光塵而躑躅度肝蠻以  
輸誠兮冀精靈之來告晞余髮於黔崖兮澡余身於雲  
瀑援青琴而欲彈兮悵沈吟而未終曲何精爽之莫接  
兮羌影滅而迹徂瞻靈座而窈窕兮託空山以羈孤但  
見夫幽泉之鳴咽兮與怪石之嶮岨禽聚巢而喧聒兮  
猿抱木而叫呼樹樛樛而障日兮藤髣蔓而塞塗牖壁  
旣棲夫虺蝮兮門庭復集夫夔魑豈丹崖碧澗之靈闕  
兮匪仙人而莫廬念歲晏而難久留兮吾將復返乎故



希古堂文集卷六  
居亂曰筓筓先生抗元修兮匪夷匪皓孰與儔兮蜚遯  
利貞不忒求兮豈與凡鳥競啁啾兮我欲從之杳莫由  
兮鼓篁古篠深幽幽兮高山安仰塊獨愁兮

祭座主故相國沈文定公文

維光緒七年歲次辛巳仲春月受業弟子南海譚宗浚  
謹以庶羞清酌致祭於中堂夫子謚文定沈公之靈嗚  
呼哀哉峯移華岳星隕中台長河涸水大野纏雷廷碎  
珪璋之彥國亡梁棟之材木稼生而達官怕龍蛇讖而  
賢人災軫悼惜於

宮廷定頒上珍而致奠動悲號於都市咸撤佩瑱以興

哀嗚呼哀哉惟公偉勳垂於國史柳篋書賢孔銘誌美  
雖陳羣之削藁罕存而韋澳之親書可紀睹魏元成之  
故笏尙慨想其儀型集謝安石之碎金應備詳其原委  
惟公盛德流於家門馳慶來葉垂輝後昆韋籛世守范  
硯家存有濮陽之里第無好時之田園述宗風則待徵  
潘岳紀家傳則宜有李繁若此者皆簡冊銘功芝蘭流  
馥刊待傳東海之碑寫莫罄南山之竹願惟小子之軫  
材幸隸高門之著錄東閣談詩西園秉燭獲侍茵憑叨  
霑醢醢切感遇而懷知特敘情而述曲聊攄徐穉之悲  
庶代羊曇之哭憶從卯歲初賦鹿鳴泥金帖報慘綠衣

輕入座抗談有慚於秦子敕銜杯壯膽難學於管公明  
公顧小子如瓊如英李邕世業王勃時名勉探學海蔚  
爲國楨庶雲霄之直上毋溝澮之自盈許任嘏爲聖童  
深承獎借呼郗愔爲小友疊荷陶成繼試春官頻趨第  
宅公直樞廷歸恆日昃巷僅容車戶難列戟然樺燭以  
插牀拾擊輒而補壁編成荻葦卽用障門爛煮葫蘆時  
聞款客杜審權則手自擁簾謝幼度恆躬親置屐雞棲  
任跨知朱伯厚之趨朝犬吠羣驚訝徐修仁之下直加  
以量極敦慳性懷謙抑羊鉅平舉士而世罕知聞顧元  
歎封侯而貌無矜飾宣猷烈於丹青播舞歌於樂石咸

共仰乎清標諒無慚於全德歲惟甲戌余掇巍科公聞  
喜慰獎<sub>平</sub>頻加謂榮名之匪貴宜厚德之負荷<sub>平</sub>毋以  
虛憍而自詡毋以華藻而自多宜法馮勤之謹慎宜同  
石慶之謙和繼而

宸馭上昇維傾軸折九土悲號三靈閭裂鳳辭社首以  
無還龍去鼎湖而杳絕公實嶷然從容贊決扶植大猷  
彌縫遺闕灑椽筆而稽禮文啟金縢而先朝列有裴冕  
鎮靜之風有周昌忠純之節調四時而幹太和靖八表  
而無杌隉余持蜀節肅拜公堂荷深情之欵洽承訓諭  
之周章謂宜介節自持屏絕劉輿之臆慎莫苞苴是縱

豔傳陸賈之裝矧斯地者人誇金穴俗謂寶鄉齊都俠  
客吳會名倡越關津而通賧貨射山澤而號貲郎近且  
莠民從萃祆教披猖甘隨裸國之裸競煽狂泉之狂宜  
正修塗之軌轍力除邪說之鼓簧禁家人玉器之持庶  
崇節儉杜署吏銀杯之化早慎提防苟處脂其不潤復  
校士以能詳又何難究經傳於卯穀而移舊俗於庚桑  
余再還京公居揆席開閣延賓憂邊念職蘇綽之渥承  
帝眷任重舌喉泉叻之屢轉官階懼形顏色值醜虜之  
疆梁致違言於疆場噓虺毒而瀾漫包獍心而反側朝  
士思誇磨盾鼻之功疆吏擬建拔壺頭之績公旋顧語

時局艱危藩羝易困市虎滋疑彼逆夷者詭同射豎害甚封豨孰不欲鬪橫江之艫舳揮絕漠之旌旗燬戶弔而誅日逐破孤竹而刺令支顧廷臣之聚訟徒騁異以矜奇半囂張而任氣罕審慎而詳思夫善奕者不輕於布算善御者無事乎妄馳城狐不容以薰灌國狗豈易以窮追苟鑄錯之偶誤卽補牢其已遲念中原之久困尙元氣之多虧觀蔡伯喈之設五難誠宜深慮學寇平仲之憑孤注竊恐非宜以故沈幾觀變遵養待時仍事羈縻之用稍遲撻伐之施昌義之自詡邊功應力排其妄論郝靈荃之欲開邊釁實共遏其興師然而塗說

多歧廷評各異謂持重爲偷安謂遠謀爲失計未明鉅  
鹿憂國之忠且等樂羊謗書之至醕酪厚不能消其忌  
心大鸞甘不能遏其橫議疑薏苡者輕構讒誣賦櫻桃  
者顯加譏刺裴晉國緋衣追逐竟難息其謠言張曲江  
白羽飄零徒自傷乎疑忌慚非降龍調象之才竟處騎  
虎握蛇之勢念時事之方阨敢求安而引退誓自竭乎  
惓忱庶可盟於天地余旋額嶠再踵緇帷雖霽顏之溫  
悅已病骨之嶽寄柳調體弱衛玠神羸廉頗則頻驚日  
短崔約則恐被風吹丹筆紫囊趨直彌勤於晚歲霜毫  
雪刺懷憂重集於茲時迫際還轅之後果聞撤瑟之悲

玉池靡嚙金甃難期坐奠俄驚於孔夢膏肓莫喻於秦  
醫陽燧空頌惜魏舒之未愈鐘懸自墮知王茂之先衰  
幸遺徽之未沫仰懿範之長垂指柳樹而憶劉惔之政  
投檝葉而縈樂預之思老稚咸歌鄧訓民夷共祀倉慈  
承黃瓊吳漢之遺定有詞臣作誄葬杜預鄭冲之側應  
多故吏銘碑嗚呼哀哉宗浚周顛才疏嵇康性拙幸依  
桃李之陰獲廁參苓之列傅南容之歸依舉主敢繼踐  
乎前徽孔北海之獎拔時流乃不遺於薄劣疇昔之年  
歡承晉接馬帳絲彈穆筵醴設角酒傳觴論文霏屑俄  
而萬里睽違經年闊別長懷陶徑之雲永憶程門之雪



何噩耗以紛傳乃巨材之先折泛渭水而思高相幸海  
宇之承平發闡州而哭房公已風塵之歿歿點瑟罷彈  
牙絃欲輟執漆器而魂夢難通殉法華而徽音永歇望  
龍門者彌增記室徘徊過馬廐者應爲平津嗚咽慚侯  
芭之負土躬先比顧愷之傾河淚掣徒擲塵之餘悲莫  
臨棺而永訣嗚呼哀哉惟茲粵嶺歸峙山堂繫小子談  
經之地昔我公駐節之鄉越臺草煖庾嶺梅香膳調芍  
藥麪供枕榔燕柏檀而馥郁薦蕉荔以芬芳楚些徐招  
想靈魂之娛宴桓箏罷按妨變調之蒼涼所望神輿肅  
肅仙駕鏘鏘控南飛之孤鶴翩下降於五羊覩昌丰於

桂管欽虔潔於椒漿想白舍人位業早成無俟東瀛龕  
返祝馬新息威靈永駐再無南海波揚嗚呼哀哉尚饗  
爲同人公祭潘貫川封翁文

惟年月日某等謹致祭於貫川封翁之靈嗚呼哀哉玉  
璞沈彩金刀掩鉉楚蘭易隕鄭柏先傷悼重泉之永隔  
怨修夜之不暘九辯之章徒招於湘魄千秋之學誰紹  
乎鄭鄉寂反真於大宅悲告禋於陰堂莫覓南山之粟  
空栽西井之桑嗚呼哀哉惟公毓秀興門鍾英卯日勤  
著然糠慧傳懷橘媿王家則養炬無雙類張氏則充融  
第一乞柳遐之坐具素稟家風對楊綰之燈檠爭推異

質固宜其駒齒奮騰鳳毛挺拔嬉翠浪以揚鬢濯丹淵  
而鍊骨者也爰來京國恪侍晨昏勤求雀炙潔奉魚殮  
儀容悅懌笑語團圓幫踰自滌枕簟先溫迨莪篇而廢  
簡爰梓里以還轅痛慘淡於悽雪極悲涼於孝泉侍萱  
闈而共處仍藥裹以躬親繫念於拊牀之日恫心於奠  
鏡之辰檐外霜寒或有慈烏之下廬前月滿非無瑞兔  
之馴既篤孝思還敦友睦上下分洄東西賃屋絕少私  
財曾無異服饌競調熊歌惟贈鹿庾約之眷懷寡姊餽  
問無虛顏含之愴念亡兄墳塋代卜遠媿轍於荀陳近  
希蹤於韓穆諒門業之獨肩信家規之允肅敦慳之行

樸獲之型慕義山重捨財籜輕論文結社惜字名亭漿  
貽楊輦藥捨宋清放鳩示德縱鴿推誠惟箕墳之究覽  
尤宋學之服膺攷訂於丹鉛之錄覃思於朱墨之銘媿  
鷺脩而志潔圖虎尾以心兢窩合同於安樂臺宜號乎  
聰明繹性義二十六條同斯淹貫積陰功三千餘律並  
此專精疇昔之年講堂肇設席据雷何門多房薛菴首  
誰歌臬比竟撤雁代贄以同趨羊仁牽而肅謁栽培則  
桃李爭芳選擇則參苓並列咸親周座之風競立程門  
之雪獲斤仁運詎有榦材歐冶曾鎔都無凡鐵衡巫之  
地沅澧之濱曾參幕職來佐衡文吟風傲睨嘯月逡巡

聆音審曲辨貌求真王儉府中自得唱酬之樂杜安門  
外曾無請謁之人皎素志以霜皓挺奇姿而嶽尊甫去  
而繞鞭是策言旋而陸橐仍貧惟盛德之絕倫斯象賢  
之濟美雖屈聲屢振於劉蕢而繼業乃鍾乎陳紀兩到  
齊稱雙丁並美金友玉昆龍文驥子紹絕學於遺籛式  
觀型於訓梓藉傳鄧禹之經永寶謝儵之史勳勗馳稱  
於唐代詎足比方郊祁擅譽於宋廷何堪例擬科名豔  
說族望爭傳蟬冠赫煥梟銑聯翩合署棣華之榜端疑  
蓬島之仙張纘弟兄騶輿排列沈沖昆季多繡纒連閎  
閱特崇於嶺外

恩綸屢賁於天邊通德之門盛矣高陽之里名焉方冀  
其角綺同儕彭聃作伴來洛社以遨遊效嵩山而隱遯  
待開戲綵之堂特築注經之苑何大化之無憑竟天年  
之倏盡驚蕙質以先摧匪茵齡而共短泰山錄事先遽  
促其歸魂蜀地涪翁曾莫延其壽算絮雞但獻於黃瓊  
奠鯽徒悲乎房瑄鏘蘭挽以風淒指松阡而路遠嗚呼  
哀哉嗟蚍應讖鬪蟻成凶徒焚柏厯空覓芎藭忽主遮  
須之國旋歸兜率之宮噩夢甫驚乎杜牧遺文待續乎  
揚雄聽鳴驢於座倒看弔鶴於門中孔文舉之興懷典  
型久渺顧長康之涕泣悲恨何窮嗚呼哀哉天道難知

神機莫測噫序須臾駒陰瞬息逝水以難回類衝颯  
而一擲胡爽報於降祥竟先摧於名德壽祇等於陸倕  
秩空增乎孫逖篋中餘稿僅剩殘篇牀上靈琴已虛良  
覬痛攀樊遜之輜恨扣羊曇之策瞻曳旒兮蕭條悼藏  
舟兮閨寂嗚呼哀哉某等或誼同孔李或名附應劉或  
忝潘楊之戚屬或叨羊左之綢繆或驥尾共郎君之榜  
或雁行陪弟子之傳椒漿乍奠桂酒新筵悲風慘慘泉  
路悠悠舊時文酒今日山邱海昏雨晦峽坼雲愁送陳  
寔者幾千人共欽重望誅郗超者四十輩咸憬前脩願  
靈駕之翩下狃天門而遠游幸託廣桑之驛重還聚窟

之淵待營芒嶺之高墳庶使幽魂而式妥儻見秣陵之  
舊札尙期精爽以常留嗚呼哀哉尙饗

潘芝堂同年哀詞

夫化龍之劍忽躍於延津剖蚌之珠或遺於赤水豈上  
世之懷珠之客非同時無識劍之人良由至貴之珍不  
容以輕褻至神之鏗詎易以長留天地亦惜其靈奇鬼  
神共驚其文采以故吳鉤滅影魏乘藏輝雖暫露乎光  
芒復長淪於晷昧不其惜歟同年芝堂潘君初名恭壽  
後更名頤福湖北羅田人祖煥龍由舉人充教習選授  
河南洧川縣知縣以詩名道光間著述甚富學者稱四



梅先生君少藉家業長爲國寶以谷九經之博洽兼孔  
獨誦之專勤芬靄緹油皋牢典籍覆圍棋而罔誤問威  
斗而必知固已老猶傾衿名流袖手至於鴻詞鉅製甫  
過目而便志於心麗句瓌章不假思而疾書於腕手鈔  
五千紙口占八十函據鞍作几而篇成刻燭當筵而詩  
就杜正元之獻賦但須援筆便揮沈不害之屬文無俟  
案書尋檢求之古人未多見也今兩廣總督南皮張公  
督學湖北時特激賞之同治九年以優行第一人貢成  
均是年中式本省鄉試舉人十三年成進士入翰林光  
緒二年散館授編修歷充 國史館功臣館纂修總纂

官京察一等充丙戌科會試同考官既通籍後尤喜博  
考典章勤求掌故凡夫侍中珮式克敵弓銘沈重朝儀  
杜夷大事容臺故實祕閣遺聞南蘭東壁之儲西掖北  
門之任鉤稽悉審洽孰無遺居恆嘗曰若使解經抉馬  
鄭之藩製賦剗班揚之壘騰今照古僕則未能至於招  
拾遺聞旁羅眾說與洪容齋楊升菴諸先生輩相頡頏  
僕竊有志焉其自命如此所著有讀書雜記若干卷是  
園隨筆若干卷精博典核卓然可傳於同年中與余交  
最摯劉璣顧思共討經疑裴迪王維頻聯篇什或坐車  
共語或連案同鈔或獲異聞而頓釋前疑或押險韻而

強令屬對或餉葛洪之楮酒而奇字相商或乞游雅之  
漿壺而古書借錄固不僅典龜命醉握麈張談繁欽借  
趙儼通財尹敏共班彪久語而已往歲掌院學士徐公  
忌余才名強以京察一等保送擠使外任時君名亦在  
薦牘中君嘗戲謂余曰若僕者仕不中人年逾強仕羨  
何祇之馬疾等劉瑀之牛遲投林之猿豈暇擇乎嘉蔭  
陷轍之鮒無所望於波臣旣同擊虞之自歎首陽聊學  
焦度之啟求外郡固其宜也若吾子者聲華日茂文譽  
斐然宜視草於鎖廳合握蘭於省署又何必縮袁宏之  
龜綬馳吉茂之鹿車哉旣而復謂曰夫鐸以聲摧玉以

光剖漆以用而割蘭以香自焚神龜以多智而受劊翠  
鳥以有文而致斃俗疵文雅諷夏侯者所以抗談物忌  
堅芳懷屈子者所爲致慨語有之惡直醜正實繁有徒  
由來舊矣今吾子神鋒太露頗類嵇康才操不羣又如  
劉峻重之者謂有冰稜之文舉詆之者謂無邊幅之賈  
遠苟競驚乎時名恐終撻乎世網所望慎其語默攝爾  
威儀同劉勝之甘作寒蟬類王育之勿輕小雀蔡子居  
之入仕毋矜貴地以驕人鮑明遠之能文且作拙詩而  
自晦與物無競飲人以和但盟白水以喻臣心莫對青  
山而談世事其庶幾免於咎戾乎余尤深感君言而惜

乎不能自克也余抵滇寓君書凡兩次未見裁荅心甚  
訝之未幾君同鄉人右秀才告余曰芝堂死矣嗚呼游  
吉之九言尙在方永佩乎良箴鄭虔之三絕云徂已驚  
同乎永訣痛哉痛哉君體素羸嘗得一子甚疴瘠絕鍾  
愛之旋抱病不起而君亦以哭子卒矣嗚呼棲塵逝水  
何去何留石火電光忽明忽滅禰衡喻之於脫蓋范粲  
比之於墜茵宜舒羸博之哀稍悟明周之旨潘安仁之  
悲傷金鹿未免多情韓昌黎之譬喻元龜實云知命設  
余在京師必有以慰喻君者不圖余遠官邊徼而君竟  
因是堙鬱以歿也痛哉痛哉余與君投贄絃韋定交杵

曰乃郵書莫報已心疑張邵凶徵而僮訃未傳究莫審  
趙嘉亡日曾不知厝棺奚處執紼誰人何時移洛下之  
輜幾日返武昌之旒茂陵遺藁孰則代爲搜羅樗里遺  
塋疇則親加臨視愁深驛遠恨阻江長訊問末由愴懷  
何極欲撫牀琴而孰對擬齋鏡具以無從嗚呼報高令  
公之德尙思刊片石以摛詞聞劉諫議之亡竊欲向九  
閩而訴屈乃作哀詞云

噫吁嘻君胡厭世而長辭兮翩乘螭其倏逝指天門旗  
戟之翩森兮果於何而暫憇世皆闇汶以無聞兮君胡  
獨善乎文章彼眠挺者旣厭君以爲瑣兮黷滾者又指

君以爲狂君雖敦敦控控以俯就時趨兮下士猶唳齟  
而不已夫庸知金根伏獵者之倨大兮謂敦洽美而南  
威鄙君雖躡雲陞而登閭風兮恆悼慄而寡歡毋亦厭  
霧濁之不可與處兮忽超舉乎汗漫余初聞乎噩耗兮  
謂傳言之貽謬何斯人之內美而粹溫兮曾不延其中  
壽繼覩夫瓦礫可升於縑籍兮蹇驢亦任乎追風悟降  
祥報善之茫昧兮疑特誑乎愚蒙君馮雲而何之兮果  
神山與懸圃俯擾擾於塵寰兮應笑蜉蝣之自苦吾欲  
尋君於帝鄉兮渺九衢之茫茫悼昔題襟之故館兮秋  
草悽以颯黃哀利鎖名韉之遞乘兮日水火其攘奪君

誠馭蹻而能來兮祇益增乎怛吾欲尋君於故里兮  
江漢邈以無梁不能呼魚鼈而使渡兮悵紅波之湯湯  
聞馮蠆之肆虐而爲灾兮滿哀鴻於中澤念昏墊之未  
易平兮君亦應累歛而太息吾欲上下四方以旁索兮  
冀遇君之飛軒恐覲面相逢而轉無語兮將歎悒而何  
言吾但願君之來生兮勿再嗜乎篇籍如阿耨光顏之  
不識字兮定擁旄而列戟余索居乎瘴鄉兮悲苦雨之  
淫淫忽披帷屑然而若覩兮意望君之降臨旣瞪目而  
無視兮仍輾轉乎虛幌夫豈吾誠之未伸兮曾莫接乎  
英爽甫抑情而自語兮念夜臺之不暘吾詎知靈輶之



果否來下兮姑敬奠乎椒漿願一輟而永別兮後路杳  
以阻長慎無學餘杭之再發乎聲響兮期體魄而永康

止菴上梁文

張平子久居禁近移外郡以多愁陳子公思到京城坐  
邊隅而是感自惟褊性祇合幽棲強就高官恐將速謗  
敢云持斧之貴倍切挂冠之思荔村先生射策南宮紬  
書東觀願同大隱恥事要人方將挹浮邱而拍洪厓豈  
徒敵楊雄而親子建乃謝公入仕初無乞郡之情而徐  
叟逼人巧肆含沙之毒陽爲薦剡陰事排擠在彼旣見  
擯於清流在我肯謬依其餘燄南山有徑羞隨司馬以

鑽營東閣難窺遂觸令狐之恚怒謬登上考迫以外遷  
果荷

鸞綸擢居豸繡在

聖主之

恩施誠厚在微臣之才具非宜當僕僕以登程每睽睽  
而戀

闕仰屋梁之落月憶侍觚棱挹清明之冷風記陪廣殿  
爰營齋室榜曰止菴常存戒滿之衷庶得避賢之義待  
更裘葛卽謝簪纓擁三萬卷以讐書購四十雙而課稻  
自稱漫叟甘作幸民遠同蘭澤騷人九畝曷嘗忘世近

比竹汀居士四品可以歸田停爾斧斤聽余謠頌望  
九重而絕遠永同蟣蝨之臣挂五兩以歸來聊結魚蝦  
之侶願堅霞諾速辦山貲如有渝盟要之息壤

移建廣東會館募疏

竊以候館載於周官置舍詳於漢制晉都洛下百郡之  
邸興焉魏據關中諸國之邸建焉至唐則選人期會半  
居興道之坊迄宋而節使趨朝肇扞迎恩之館莫不高  
閨宇飾棖櫺度几量筵庀材礪石其斯爲會館之權輿  
已

聖朝德被埏紘譯通尉候上計之吏屬屣而麇趨履絢

之儒纒連而鱗萃咸通置騎之驛不寄寓公之廬其見  
於近賢文集者若湯文正公倡建中州館陳文貞公倡  
建三晉館楊勤愨公倡建臨江館阮文達公倡建揚州  
館尤其卓卓足徵者也我粵東館舊在正陽門外打磨  
廠近

北闕星辰之地咸沐恩榮萃南州冠冕之倫此焉游止  
顧以星霜久閱梁棟多傾崇墉搢於牛宮講肆鄰於馬  
隊王逸少欲觀禮殿徒企想其儀型蔡陳留擬賦靈光  
已難言其彷彿眷言遺址祇賸積垣宜覓新居別營壯  
觀僕等叨居京秩繫念鄉恭思爲改井之謀未遂買鄰

之願蓋徘徊而有待者固已久矣茲購得宣武門外南  
橫街董氏宅一區階城平完軒庭敞拓接古懽堂之故  
躡曾寓詞人等親仁里之幽居素稱吉第稍加營葺足  
壯觀瞻夫昇高明處臺榭固戴經之所美也累層構拓  
宏規又班賦之所稱也矧今

景運中興

皇風鬯穆惟粵地夙鍾靈淑逮邇年尤盛簪纓司台袞  
者比肩不數潁川冠蓋登巍科者接踵勝如蜀地詩書  
咸翱翔乎禮義之林並孺臍乎滂醲之澤營茲傑構詎  
曰非宜惟是倡導有心建修無力異化人之淨宇非偃

師幻術能成譬開士之祇林豈德勝搏泥可造伏願秉  
節乘輶之彥剖符專閫之英五管章縫三城俊乂各捐  
贏羨用助勾工總羣力以輿瓢偕眾擎而建柱合尖儻  
就勝營七級浮圖庀曷咸歡此卽萬間廣廈待刻古賢  
事迹規模同畫像之堂懸知髦士科名瑞應比銅官之  
廟

受業子壻陳慶蘇校字